



Senin, 27 Pebruari 2023

Ogen: Matius 7:24-27



"Palas Si Paguh"



Batu sada benda si cukup keras, paguh la murah pecah la murah miser adi la ipeser kalak. Biasana ipake kalak jadi palas i bas majekken rumah. Batu e iandingken Jesus ku bas kata Dibata, entah ku bas diriNa jine. Kalak si majekken rumah ibabo palas batu si enteguh, rumah e la murah runtuh di kune pe lit angin meter entah udan si meder nderpasa. Rumah si palasna Kata Dibata, tetap paguh di kune lit perbeben ras persoalen si mesangat nendengsa. Sabap Kata Dibata e si mereken gegeh ras kepentaren ngalaken persoalen e seh maka seisi jabu tetap nggeluh i bas dame. Uha kin kataken kata dibata Palas i bas jabu? I ja kerina se isi jabu tutus megiken kata Dibata subuk i bas kebaktin gereja, perpulungen jabu-iabu, PA kategorial ras ibadah keluarga. Labo terjeng megiken ngenca tapi kai si ibegina idalankenna i bas kegeluhen jabuna. Enda me nian Jesus kalak pentar. Kata Dibata engkuasai pusuhna sekalak-sekalak ras engkuasai jabu e, seh maka meriah atena katawari paksa pe amin reh angin ras lau si ergalumbang nderpa rumah e.

Petembil ras si e, kalak si la ibahanna kata Dibata palas jabuna, ikataken Jesus kalak lenge. Ia terjeng megiken kata Dibata tapi la idalankenna i abs kegeluhenna. Si enda iandingken Jesus bagi kalak si majekken rumah i gurun pasir, Pasir biakna menahang, banci miser dikune iembusken angin entah ibabaken galumbang lau. Di kune lit persoalen nderpa jabu e, murah sontar arih, pecah la siangkan, sabap sada pe labo erpersukuten ras Dibata. Pengajuk banta, Tuhanlah si ajdi palas jabunta, alu tutus kita megiken ras ndalanken kataNa.